

四庫全書

集部

欽定四庫全書

御製文集

集部

目錄
卷一至二

武英殿纂修原任編修臣吳裕樞恭繕校

欽定四庫全書

御製文餘集目錄

卷之一

詔

丙辰元日傳位于皇帝並却上尊號詔

諭

重舉千叟宴加恩百歲壽民等諭

授受禮成申恭撰進頌冊諸臣諭

再免湖南湖北明歲應徵錢糧諭

蠲承德府屬明歲地丁錢糧諭

命蠲免湖北被擾州縣及附近之湖南龍山四

川酉陽地方本年應徵錢糧諭

命蠲免四川達州陝西漢中興安府所屬被賊

地方來歲應徵錢糧諭

命蠲免貴州南籠安順貴陽所屬地方未完銀

穀及本年應徵秋糧諭

再免貴州興義永豐等處一年錢糧及獎賞兵

勇諭

命蠲免四川夔州府屬明年應徵錢糧諭

記

匣衍記

觀瀑亭紀實記

序

補詠平苗戰圖四章序

卷之二

識語

上元前一日家讌親藩及曾元詩識語

二月朔日作詩識語

詠和闐白玉椀詩識語

題文津閣詩識語

詠荷一律識語

安眠口號識語

上元後一日小宴廷臣詩識語

嫌偽詩識語

題四朝選藻冊詩識語

閱授受禮成示撰進頌冊諸臣諭識語

上元日詩識語

問津處口號識語

鑑遠堂詩識語

題和闐玉筆筒詩識語

題韓幹畫馬詩識語

戲題眼鏡詩識語

直隸總督胡季堂奏報二麥約收九分有餘詩

以誌慰識語

口號識語

鑑始齋題句識語

含德齋詩識語

物魚亭得句識語

石城詩識語

雜著

書虞書舜典集傳

欽定四庫全書

御製文餘集卷一

詔

丙辰元日傳位于皇帝並却上尊號詔

朕纘紹丕基撫綏函夏勤求治理日有孜孜仰賴

上天眷佑

列聖貽謀寰宇乂安蒸黎康阜聲教四訖中外一家御
極以來平定伊犁回部大小金川擴土開疆數萬餘里

緬甸安南廓爾喀以及外藩屬國咸震懾威棱恪修職貢其自作不靖者悉就殄除功逮十全恩覃六合普免各省漕糧者三地丁錢糧者五展義巡方行慶施惠蠲逋賑貸不下數千萬億振興士類整飭官常嘉與萬邦黎獻海隅蒼生同我太平躋之仁壽朕持盈保泰弗懈益虔勤念雨暘周諮稼穡於庶言庶獄庶慎靡不躬親宥密單心時幾交勅用疊上副

祖宗付畀之重下撫億兆仰戴之誠日慎一日六十年

於茲矣迴憶踐阼初元曾默籲

上蒼若紀年周甲當傳位嗣子不敢仰希

皇祖以次增載今敬迓

洪釐幸符初願朕康強逢吉九旬望袞五代同堂積慶
延祺光於往牒非

昊慈篤祐申命用庥曷克臻此

天生民而立之君使為司牧授受之際敢不兢兢溯自

癸巳

南郊即以嗣位皇子之名默奏

上帝並於盛京恭謁

祖陵敬告

烈祖在天之鑒昨冬頒朔屆期特宣布詔旨明定儲位
以丙辰為嘉慶元年預勅所司敬議歸政典禮皇太子
秉性謙沖臚誠固讓率同內外王公大臣等具章請朕
至百歲始行斯典但

天聰維聰朕志先定再四申諭勿得懇辭皇太子仁孝

端醇克肩重器宗祏有託朕用嘉焉已諏吉祇告

天

地

宗廟

社稷皇太子於丙辰正月上日即皇帝位朕親御太和
殿躬授寶璽可稱朕為太上皇帝其尊號繁文朕所弗
取毋庸奏上凡軍國重務用人行政大端朕未至倦勤
不敢自逸部院衙門及各省題奏事件悉遵前旨行履

端首祚禪授上儀宜沛新綸同敷愷澤布告天下咸使聞知

諭

重舉千叟宴加恩百歲壽民等諭

本日舉行千叟宴京畿及各旗籍兵民踴躍偕來相預盛典龐眉皓首矍鑠盈廷實為吉祥盛事業經分別加恩普加賞賚並各加賞緞疋銀鏤外所有老民熊國沛年一百六歲邱承龍年一百歲尤屬昇平人瑞俱著加

恩賞給六品頂戴其九十以上老民鄧永玘梁廷裕閑散覺羅烏庫里步甲文保舒昌阿馬甲王廷柱內務府閒散人田起龍王大榮俱著賞給七品頂戴以示引年養老敷錫壽祺至意

授受禮成申示撰進頌冊諸臣諭

本年舉行傳位大典大小臣工撰進冊頁朕幾餘披閱多有稱頌功德揄揚盛美其辭未免過諛實甚慚愧朕御極六十年来敬

天勤民用人行政一切實心實事天下臣民所共見共聞今將諸臣所進各冊遴其措詞尤雅者以備觀覽自宜酌加獎賚特將內庫藏貯蟒袍緞疋荷包等件分別頒賞以志一時賡颺之盛惟冊內間有稱乾隆六十一年者雖係臣下頌禱之詞但朕自御宇初年即焚香敬告

上蒼若紀年周甲當傳位嗣子不敢仰希

皇祖以次增載之數節經明降諭旨宣示中外今敬迓

洪釐幸符初願新歲大廷授璽鉅典商皇實史冊所罕
覲朕仰邀

昊眷精神純固於巨細政事仍當躬親綜攬弗懈益虔
至於授時頒朔已書嘉慶初元若於乾隆六十年後復
以次增紀轉非朕當日籲

天不敢同

皇祖之初志即嗣皇帝於年前率領王公大臣等恭進
乾隆六十一年時憲書百本朕亦祇令於宮廷陳設及

金史卷之八
卷八
頌親近王大臣而各省頒行仍俱係嘉慶年號內外章
奏亦一體令書新元可見朕志先定積久弗渝今自元
辰授位時序均調現屆中和節已沛春膏優渥視往歲
更為暘雨應時此皆朕誠意久孚於默禱初心不敢稍
有踰越用能懋膺

景貺篤祐延釐而諸臣獻冊臚忱既過於頌禱又無懷
觀望未能深喻朕志特此再行明白宣諭用示朕凝承
天命永矢敬誠至意

再免湖南湖北明歲應徵錢糧諭

湖北教匪滋事肆行劫掠焚燬邨莊業經官兵屢加勦
殺而該省紳士百姓等能知大義團練鄉勇隨同官兵
打仗殺賊實屬可嘉湖南省勦捕苗匪現在首逆就獲
官兵即抵乾州指日大功告成第念附近苗疆地方多
有被苗匪蹂躪占種田土民人不免失業即軼遠各州
縣運解糧餉軍需等事亦不無有資民力朕心深為軫
念宜加渥澤以示體卹除該二省被賊擾累地方業經

金匱要略卷一
加恩分別蠲緩外著再加恩將湖南湖北二省來歲應徵錢糧俱行豁免俾被擾失業者得以復其生計而急公出力者亦可更資溫飽並著該督撫速行謄黃宣示務令鄉邨僻壤咸使聞知用示朕惠鮮勞來有加無已至意

蠲承德府屬明歲地丁錢糧諭

本年係朕傳位為嗣皇帝元年仰蒙

昊蒼眷佑累洽重熙朕同皇帝駐蹕山莊雨暘時若秋

成上稔景象恬熙允宜特沛恩施行慶敷錫但承德府及所屬今歲本係輪免之年秋收又屬豐稔所有該府及所屬州縣明年應徵地丁錢糧俱著加恩普行豁免俾駐蹕地方小民益臻饒裕以示施惠邊氓有加無已至意該部即遵諭行知務使窮鄉僻壤咸諭朕意

命蠲免湖北被擾州縣及附近之湖南龍山四川酉陽地方本年應徵錢糧諭

前因湖北賊匪滋擾業將枝江宜都長樂長陽東湖當

陽遠安七縣降旨緩徵續據畢沅等奏歸州興山南漳穀城宜城光化均州鍾祥竹山竹谿房縣保康來鳳等州縣並湖南之龍山四川之酉陽州均有賊匪搶掠雖指日大兵雲集無難尅日蕩平但念各州縣當賊匪蹂躪之餘未免流離失所且各處鄉勇人等義切同仇守城殺賊奮勉出力甚屬可嘉著加恩將前經緩徵之枝江等七縣並續被賊擾之歸州等十三州縣及湖南之龍山四川之酉陽州本年地丁錢糧均即全行豁免以

示優恤而昭激勸

命蠲免四川達州陝西漢中興安所屬被賊地方

來歲應徵錢糧諭

現因四川達州並所屬之新寧太平東鄉地方教匪滋事並闖入陝西漢中府所屬之西鄉及興安府之安康平利紫陽等縣業經官兵痛加勦洗不日自可撲滅淨盡第念各該處被賊滋擾召募鄉勇堵禦並運送軍糧耕作不無失時殊堪軫念現在已屆歲底本年應徵錢

金匱要略卷之四
糧自己全完所有四川達州新寧太平東鄉並陝西漢
中府屬之西鄉及興安府所屬之安康平利紫陽等州
縣明年應徵地丁錢糧俱著交該督撫查明普行豁免
以示朕惠愛良民格外恩施至意

命蠲免貴州南籠安順貴陽所屬地方未完銀穀
及本年應徵秋糧諭

南籠仲苗滋擾安順貴陽所屬州縣邨寨多被焚掠不
特麥收無獲即秋成亦屬失望該處本年地丁錢糧改

徵等項均奉恩詔輪應全免惟上屆嘉慶元年錢糧各款例應於次年奏銷以前徵解現在被難民人尚需接濟撫綏力難完繳所有南籠通府屬地方安順府及所屬普定郎岱鎮寧並貴陽府屬之廣順定番長寨等處各廳州縣上年應徵錢糧改徵米石除已經報解外其未完銀穀等款著加恩與嘉慶二年應徵秋米正耗全行蠲免以紓民困

再免貴州興義永豐等處一年錢糧及獎賞兵勇

諭

據勒保奏官兵攻克普坪後乘勝渡河進擊殲斃賊匪
無數拏獲緊要賊目餘俱潰散官兵至南籠城內難民
男婦數萬均來迎接當將裹帶糧食及連日所獲賊糧
按名散給並即派員賑撫一摺興義府城受困半載城
內紳士民人等深明大義晝夜備禦捐助薪米得以同
心協力固守無虞今勒保解圍到郡見城內難民口食
不敷情形已極疲憊實堪憐惜所有興義應徵錢糧著

該督查明蠲免一年其餘被賊滋擾地方如永豐冊亨
捧鮓黃草壩及粵滇邊界被擾各等處亦均著該督撫
查明各免一年錢糧俾閭閻元氣漸復民力寬裕用副
軫懷其守城兵勇均著加恩賞給一月錢糧口糧以示
獎勵

命蠲免四川夔州府屬明年應徵錢糧諭

前因達州及所屬東鄉太平新寧等處賊匪滋擾上年
冬間降旨將該州縣本年應徵錢糧蠲免今夔州府所

屬地方復有教匪闖入經官兵分投勦捕諒可即就撲滅但念各該處運送軍糧及召募鄉勇堵禦耕作不無失時本年業已開徵錢糧自己陸續輸納所有夔州府屬之奉節巫山雲陽萬縣開縣大寧等六縣明年應徵地丁錢糧著該督查明概行豁免用示朕軫念閭閻瘁被兵燹施恩體恤至意

記

匣衍記

匣衍記有三一以誌

交泰殿所藏御用國寶一以誌

端凝殿所藏御用朝珠

乾清宮為正殿東西兩廊為長
廡東廡中三楹為端凝殿取端

冕凝旒之義是以御用冠袍帶履俱貯於此
所御冠服朝珠均恭貯其南三楹蓋因貯藏香及西洋

鐘表等項是以沿稱為自鳴鐘寶仍統於端凝殿也詳
見國朝宮史其西廡中三楹為懋勤殿取懋勤文武之

義故以貯典籍文房其南三楹則每日所進閣本批票
之處皆係內閣侍讀中書等官入直者司其收發仍係

內閣大學士所轄不似明季一任秉筆太監高
下其手此我朝制度之善所以迴越前代也
一以誌

壽皇殿所藏御用諸璽予即位之初承

三朝所貽御物頭緒紛繁中使無晰理明文之人屏當或致顛倒初政無暇及此也乾隆十一年春始因交泰殿舊藏國寶記載流傳其數失實爰取周易大衍

天數二十有五之義定為二十有五之數詳見本殿記又於乾隆十七年春閱乾清宮東廡之端凝殿恭貯

列聖禮服所御朝珠更定為二十五層之匣以俟奕葉按代遞用亦詳見本殿記復於乾隆四十六年冬敬將聖祖

世宗常用諸璽及朕自青宮至御極以來數十年中所用諸璽製為寶藪匣並豫衰空冊亦定為二十五層藏於

壽皇殿以備將來依次存貯簽用世為法守右此尊藏三大事予皆定以

天數二十有五者其義亦有說乎曰有說蓋天子所重以治宇宙中經綸莫重於國寶而涉筆記事之璽即其次也我國家禮服飾以朝珠

金史卷一百一十五
卷一
祖宗所御典禮攸存定寶數之時密用姬周故事默禱
上蒼祈我國家若得仰蒙

慈佑歷二十五代以長斯亦難矣此實侈望然邦鄔定
鼎卜世卜年已著其例敬思自古以來未有一家恒享
昊命而不變者此意恒存於心而不敢言茲予以難期
八十有六歲之侈望而得符願傳位授政實賴

鴻眷或者侈望我大清得享號二十有五之數亦可

俯賜符願乎夫卜世卜年固在人而

賜世賜年則在

天叨

天之佑非敬

天愛民無別道而此敬愛之心若一時有間欲希

昭鑒弗可得此不大應懼乎予所以因

吳貺而愈侈望愈憂惕虔為是記以示奕葉之聰聰者

觀瀑亭紀實記

按亭仰對石壁俯臨溪水石壁名為

湧翠巖亦

皇祖御題也其上三間佛宇傍有池瀑水瀉自池擘石壁而出飛流落長溪溪上構亭觀瀑所以得名也但瀑之源乃出佛宇傍之池而池中實無泉源康熙年間於茲寺西厯數谷壑尋得一山泉接木板匣為溝渠沿山邊谷壑引流至寺池乃擘石壁而下則誠飛瀑矣飛瀑誠真飛瀑乎以

皇祖聖明無微弗照不過藉司工者之巧為託綴景之

虛名而已其後朕視木板匣為溝渠置山邊不雅且每

費修飾因循其上山逕側果有一小泉命建一亭名曰

瀑源

事在己卯年

鳩工疏山邊為溝渠越壑過谷引流曲折

以達於湧翠巖之寺池則真有瀑源矣茲又閱數十年

往來山徑中覺其泉細而石罅噴乳竇處復低於寺側

之石池且越數層谷壑之遠無論木石之渠溝胥不能

引細微且遠之泉以達寺池為飛瀑則所謂飛瀑者不

過人舉置水滿寺池使洩而為飛瀑耳我

皇祖不名之曰聽而名之曰觀或亦

知其假借而

寓有深意乎且予命以石溝易木匣之時未曾深知此事而司工之大臣三和必當知此乃隱而不言以遂朕過則為君者之過人臣不敢言以遂其過者多矣是不大可懼哉茲命皇帝率御前大臣及司工之人攜儀器步步測量乃知泉果低於寺池且其流細不能引至為飛瀑而自泉之下至寺池有山池九疊疊皆置閘積雨

後山水放流由沿山邊石溝以至山寺則誠真瀑矣山池在泉下雨多水漲亦未嘗不流至池則命泉為源庶亦可耳然三和終未明言及此也夫瀑源誠細事積數十年之久而茲乃得其實事之久遠文之委曲心之操蘊意之好實惡假皆不可以不記序而書之後之人或有以識吾志也矣

序

補詠平苗戰圖四章序

平苗役藏於丙辰之冬既於丁巳春聯句以紀其事因
命仿舊日西師金川臺灣之例繪為戰圖圖凡十有六
內十二圖舊有紀功之作即命書於圖上其四圖無詩
因補成之夫苗疆自康熙雍正年間陸續戡定改土歸
流食土踐毛百有餘歲實與民無異乃乙卯之春楚省
石三保石柳鄧吳半生等互相煽脅劫掠鳳凰乾州永
綏三廳地方其時福康安在滇南一聞此信即帶兵馳
赴貴州松桃正大一帶勦辦並有闌入四川秀山境者

適和琳已放四川總督自藏回川得報不待諭旨即馳往會勦節次攻克賊寨擒獲渠魁功屈垂成而二臣因勤勞軍務先後病逝良可惜也是役自始事訖藏功凡閱二年苗疆悉就底定今則田田宅宅各安作息久矣溯自用兵以來籌筆之焦勞決機之次第以及將士之艱辛胥於詩乎見之撫斯圖也惟勤思止戈為武之義益慎撫綏而圖安輯非云侈功績也既補成四詩爰序其梗概以示來茲

御製文餘集卷一

欽定四庫全書

御製文餘集卷二

識語

上元前一日家讌親藩及曾元詩識語

按大雅行葦之詩所以讌父兄耆老示慈惠而敦親睦也予每歲元旦及上元前一日家讌近支宗藩自壬戌年始有詩紀事戊辰以來上元前日宴必有詠已成例事今入座者皆予子孫曾元之輩若蒙

天

祖眷佑再閱四五年即可望得來孫之喜而今歲元日
授璽歸政為千古第一全人明年慶節曲宴為子皇帝
之事予但當隨意拈吟似此例成之什可以從簡矣并
識

二月朔日作詩識語

上年二月初四日據湖廣總督福寧提督劉君輔湖南
巡撫姜晟貴州巡撫馮光熊馳報貴州銅仁府大塘苗

人石柳鄧勾結湖南苗匪石三保等滋事不法迫脅各
苗寨聚衆搶掠焚燬民居經督提各臣帶兵進勦因即
降旨令福康安往辦而福康安於未接諭旨之前即自
雲南馳赴銅仁不待所調之兵到齊先將正大營之圍
解散節次又將嗅腦松桃一帶賊匪勦殺開通道路其
時苗匪有竄入四川秀山縣境者勾結滋擾亦被官兵
截勦適和琳新授四川總督自藏來京入覲行至邛州
地方聞有此事即一面馳奏一面帶兵兼程馳赴秀山

將賊匪痛勦其晏農炮木山川河蓋一帶所屯苗匪亦
節次殲戮殆盡於閏二月內福康安和琳會兵一處自
黔入楚軍威大振將黃瓜寨蘇麻寨大烏草河等處攻
克節次擒獲賊首吳半生吳八月漢奸諸人賊勢已極
窮蹙又續據奏攻克金嶺沖攻破吉吉等寨而相率歸
降之苗寨亦有數千百戶現在將石柳鄧石三保等擒
獲後即可直抵平隴收復乾州大功告藏此事本由逆
苗自作不靖曲直之理

天鑒昭然惟因地勢險峻雨雪凜滑賊苗得以負隅抗
拒致稽時日今已閱一年事迨垂成盼望益加殷切亦
惟仰籲

昊佑指日成功捷信即至經理善後事宜俾萬民永久
安居樂業耳

詠和闐白玉碗詩識語

按玉之美者為瑜其疵為瑕禮記聘義云瑕不掩瑜瑜
不掩瑕又左傳云瑾瑜匿瑕予以為此有二義所謂不

掩者蓋其質美處多而考類少不可以小疵而棄其大醇傳所云不以一青掩大德即此意也至匿瑕者乃大舜隱惡揚善之義若玉之材質大段果屬精純即微有瑕玷亦尚可包容含蓄不至棄捨是以辛巳賦得詩有隱之略一玷揚矣獲連城之句夫全材希有用貴取長因詠此盥復絜矩及之并識

題文津閣詩識語

乾隆辛酉舉秋彌之典因來此駐蹕壬辰以後每過夏

至大祀即來避暑率成恒例如含德齋

在清舒山館內額為皇祖

御書予辛巳題什有書齋額

堯箴之句

鑑始齋

于年十二時蒙賜居於此處讀

書因以名之

文津閣

是閣與紫禁御園盛京之三閣均仿范氏天一閣之制以貯四庫全

書者詳見閣記

戒得堂

得四字小

皇祖聖壽望七時曾命錫戒之在萬壽前作是

堂於清舒山館之左因以戒得名堂詳見前後記中

永恬居

額亦予甲戌年續增山莊

二字名之三十六景此其末一景也

招涼榭

在遠近泉聲之旁予題曰招涼榭每年避暑來此必有題

什懸楮間上年已遍即有題滿罷詠聽其常之句益以上年已滿六旬今歲即可不必例詠矣

諸處積

年之詩張壁已滿今幸紀元符願授璽觀成似此例作

之詩原可停吟惟今年子皇帝掖奉安輿駐斯待獨亦
千古未有之盛軌即景抒懷又有不能已於言者但八
旬望九歸政養閒之老人誠宜一切從簡且五集已盈
四萬餘首亦自厭其多矣意將大減拈豪因書題閣之
什並識如右

詠荷一律識語

每歲駐蹕山莊塞湖菡萏舒英例有題句書懸觀蓮所
檐壁至上年乙卯四圍已滿因命董誥將歷年之詩彙

書一冊陳之硯左並識明丙辰歸政後可不必依例題
句但予仰蒙

吳眷紀元周甲心願符初今歲元正大廷授璽稱太上
皇帝幸為千古全人而予皇帝拔奉安輿莅斯待彌情
景與每年無異又不可不摘詞以誌千載一時之盛復
成七律一章即鐫冊匣之面明歲來此竟當如前約簡
詠武列君子亦必知予意也御識

安眠口號識語

按不怨不尤之語出論語子以為不怨不尤未免仍存二字之意在惟應自思已過知過而改乃益善然言之易而行之難無意書此成語以為口號亦紀近日學詣之境耳

上元後一日小宴廷臣詩識語

向例上元翌日掄廷臣小宴以示寵眷必有詩二律書懸勤政殿東之飛雲軒壁間以誌歲月至六十一年丙辰軒中四壁剩一而週再無隙處且上年元正授璽後

似此依例成吟之什原可從簡但訓政如常是以上年
宴畢復成二律用紀符願順成之盛迨今歲則已閱二
年竟可罷詠聊成此什令懸殿外嗣後當不必依例復
題矣

嫌偽詩識語

聖學在乎存誠非是則為偽是以作聖之功去偽為最
要予臨御六十餘年毋論用人行政諸大端必出至誠
即尋常言動無不由中而發一秉大公至正之心絕無

虛飾所以推己及人甚惡人之作偽以自欺欺人者午夜偶思及之即成是什無非述經書語亦欲人人深維聖人垂教存誠去偽之旨時自警惕始不虛予此願昨數年每失眠鮮寐近漸佳矣卧錄是什後仍安寢較之常日更羸數刻是亦心逸日休之一驗乎

題四朝選藻冊詩識語

右四朝選藻四冊乃乾隆庚戌夏所鑒定者其時勅內廷翰臣纂輯石渠寶笈續編因出內府所藏唐宋元明

集繪冊命擇其尤佳者得唐人一宋人二十九元人三
明人七釐為四冊各十幀以時代先後次其甲乙非於
畫品有所軒輊也裱成後名曰四朝選藻以元亨利貞
分標之緣就所有之幀為去留故四朝惟取其人之備
而其多寡之數則不能均焉次年辛亥清和各題以詩
分書幀中首冊五言律二冊七言二韻三冊五言三韻
四冊七言律攢體分殊非以見異騁妍庶每冊各從其
類弗致有參互淆紊之失耳石渠續編中此冊已著錄

閱今數年矣而尚未登黃綾詩本蓋辛亥以後所成各詩或述政事之大端或寫性情所偶寄與夫問暘雨課耕斂即事摘毫均非無為而作每歲詩本已盈無資以此補空逮上年丙辰大廷授璽初願幸符仰荷

天

祖眷詒精神純固予亦何忍遽圖自逸是以籌幾訓政猶日孜孜於事之重且要者仍如常年見諸篇什雖理宜簡詠而結習未忘浹歲所吟亦已足百篇二帙於是

此詩復存篋中茲遊盤山以籌軍務望捷音之故雖來
散悶而悶乃日增故即景拈辭亦少於往歲既檢斯舊
稿錄登詩帙用補每年三春百篇之數仍於本畫冊末
識其緣起如右乾隆六十二年丁巳季春御識

閱授受禮成示撰進頌冊諸臣諭識語

前諭既申明朕即位之初焚香告

天紀元周甲當傳位嗣子不敢仰希

皇祖用舊年號以次增載及授受禮成後遂命內外章

奏一體令書嘉慶新元用示凝承

天命至意惟乙卯頒朔之時因嗣皇帝率領王公大臣等恭進乾隆六十一年時憲書朕不欲重違所請祇令備進百本陳設宮廷及頒賜親近王大臣等不令徧行中外而勅旨頒發書太上皇帝者自應仍以乾隆紀年亦體制不得不爾敬思朕自十二齡時受

皇祖恩眷即有福澤較厚之

諭今果荷蒙

吳蒼洪貺於六十年舉行傳位大典朕年躋望九精神
純固日勤訓政親見五代元孫來年即可冀得來孫之
喜諸福具備此實受

天之祐過於

皇祖當日

眷顧深衷貫至今日朕疊受

蕃釐益深敬凜於凡朕之御旨御筆紀元仍用乾隆叙
年亦體所當然於朕初元籲

天不敢仰希

皇祖以次增載之意仍並行不悖益以徵國家景祚龐
鴻延庥襲慶為千古以來未有之盛軌也因披覽前諭
復申識語如右乾隆六十二年仲秋月

上元日詩識語

予自授璽後擬將每歲依例成吟之什量為酌簡屢見
之題詠惟丙辰丁巳上元前一日家讌親藩及曾元輩
仍俱有詩章懸之奉三無私殿壁其後一日小宴廷臣

二律向懸勤政殿東之飛雲軒至丙辰而四壁已滿再
無隙處昨歲丁巳因成五律一首懸之殿外其上元節
日詩章向懸同樂園殿壁今又屈元夕風月清佳余自
揣精神純固訓政如常實為高年盛事但望九之年吟
詠原宜從省無以近日盼捷縈懷吟興稍減是以將年
例茶宴聯句停止其上元前一日後一日之讌但依例
舉行不紀以詩此後節日例作亦似可簡吟矣

問津處口號識語

假山上三間樸屋額以問津廼

皇考御書也其聯用歸去來辭語則予有意所題下小
嶺有彙芳書院在內蓋其時即有歸政來居於此之意
因循四十餘年其間復建長春園於圓明園之東茲偶
過此因思予二十五歲登極至乾隆二十一年書此聯
時已四十六歲矣而望六十年則壽當八十五歲在可
必不可必之間今蒙

上天垂佑竟符初願傳位于皇帝予仍日勤訓政康健

如常實千古僅有之事回憶書聯時歲月堂堂舊題如
昨爰笑而識之

鑑遠堂詩識語

是日憩坐之際適接德楞泰奏言齊王氏姚之富大股
賊匪由陝省山陽石河鋪一帶東竄先經派令賽沖阿
溫春等分帶官兵在高填店漫川關堵截明亮德楞泰
督兵由黃隴鋪寬坪等處兜剿賊匪分三路竄逸德楞
泰明亮等亦分三路並進賊衆排列左右兩山分投抗

拒我兵搶上山梁奮勇擊殺殲斃千餘賊匪力不能支紛紛逃竄德楞泰明亮等乘勝追擊賊匪復分兩股欲竄往東北俱被官兵截殺折回向西南甘溝一路逃遁該處路通楚北鄖西地界官兵晝夜追擊一百七十餘里殺賊二千有餘賊勢披靡惟首逆尚在逃竄德楞泰明亮等帶領滿漢屯土官兵由鄖西縣之上津堡一帶兜勦隨勦隨進逼至三岔河地方擒獲賊犯詢知齊王氏姚之富俱在左首山梁德楞泰明亮賽沖阿阿哈保

溫春達音泰阿穆勒塔德寧等督率奮勇官兵將山梁
四面圍住逆匪等猶滾石放鎗抵死抗拒官兵一湧直
上齊王氏姚之富二犯逃至險峻處所棄馬奔越吉林
黑龍江官兵亦皆下馬同步兵上緊擒拏齊王氏率婦
女十餘人投墮陡崖姚之富亦向懸崖跳落官兵飛馳
擒捕姚之富已經跌斃齊王氏尚存餘喘均即臠割斬
梟傳首示衆並擒斬大小頭目二十四名殲斃夥黨三
千餘名又於山梁溝內搜捕勦殺四千餘名生擒者一

千餘名此三月初六日事也楚匪滋事以來蔓延日久
皆由齊王氏姚之富二犯首先集衆焚劫到處逼脅良
民抗拒官軍實為禍首罪魁今日殲除雖未得生擒
解京而首逆俱經伏法餘匪實已喪胆亡魂此時陝境
之賊惟高均德與李全張添文兩股奔竄稽誅經德楞
泰等帶領勝兵及額勒登保秦承恩王文雄等分路兜
捕不日即可擒渠歲事其在川境者如徐添德王三槐
冉文儔羅其清諸首逆自皆聞風震懼尅日亦可成擒

勦捕教匪大功已不啻過半矣披閱捷章因成是什並
詳識如右

題和闐玉筆筒詩識語

國家威德覃敷無遠弗屆外藩屬國歲時進至表章率
用其國文字譯書以獻各國之書體不必同而同我聲
教斯誠一統無外之規也我朝國書增損蒙古書而成
書寫自左方直下成行而右漢書則自右而左朝鮮安
南琉球諸國皆用漢書西番天竺緬甸暹羅南掌西洋

俄羅斯廓爾喀苗疆皆各有書橫行自左而右惟回部
及蘇祿國書橫行自右而左夫疆域既殊風土亦異各
國常用之書相沿已久各從其便正如五方言語嗜欲
之不同所謂修其教不易其俗齊其政不易其宜也偶
題和闐玉筆筒因及回疆文字復思今日溥天率土各
國之書繁夥而統於一尊視古所稱書同文者不啻過
之爰即文房題詠觸類引申益凜持盈保泰之念非曰
貴遠物詡珍異也并識

題韓幹畫馬詩識語

按杜甫丹青引贈曹將軍霸云弟子韓幹早入室亦能
畫馬窮殊相幹惟畫肉不畫骨忍使驂騮氣凋喪繹杜
甫詩意顯抑韓而譽曹考歷代名畫記稱幹善寫貌人
物尤工鞍馬初師曹霸後乃獨擅名唐元宗好馬御廄
至四十萬匹時有沛艾大馬西域大宛之種命幹悉圖
其駿遂為古今獨步後世羶鄉韓畫者至以為通靈感
神趙孟頫云唐人善畫馬者甚衆而韓曹為之最是幹

聲譽不在曹霸之下或青過於藍亦未可知少陵丹青引本以贈曹譽其師自不得不排其弟子則畫肉不畫骨之說或未免過苛且代遠年湮曹畫絕少流傳而杜詩則意存軒輊若據此以定其師弟畫品高下恐未為確評也偶題韓幹畫馬因及杜甫詩附論於後

戲題眼鏡詩識語

眼鏡古無此物自元明始来自西洋今則其用寔廣有玻璃水晶二種玻璃出於冶鍊不若水晶無火氣為良

余向以其資人巧而失天真從不用之詳見辛丑辛亥
舊作計辛丑作詩時予年逾古希辛亥則已過八旬今
且將望九矣雖目力較遜於前然披閱章奏及一切文
字未嘗稍懈有以眼鏡獻者究嫌其借物為明仍屏而
弗用因戲成此詩示意並以識歲月

直隸總督胡季堂奏報二麥約收九分有餘詩以
誌慰識語

予自御極以來於各省雨暘歲收刻縈懷抱六十餘年

如一日每值收成豐稔惟益增虔惕或間遇一隅歉收必再四馳詢各該督撫不得稍有諱匿其稔收地方或所收之數浮於所報之數率置之不問誠以豐不可謂而歉不宜諱惟願各省大吏體此意以予惠黎元庶不負牧民之責即如此次直隸所報麥收分數蓋因宣化承德二府屬向來不種秋麥所報分數較少通省牽算裒多益寡尚得九分有餘此實上稔之占允堪欣慰即所收已逮十分亦寧存戒滿之念不敢稍涉誇詡也爰

識此以明予志

口號識語

前戲題眼鏡詩以其借物為明屏而弗用曾有識語示
意茲更引而申之余以望九之年披閱內外章奏未嘗
稍懈即經書刻本亦仍照常展視且多係誦習之文背
讀兼可節省目力若蠅頭細字不見固自無妨又何必
借資他物為明耶因口占此作以廣前意并識

鑑始齋題句識語

余十二時蒙

皇祖賜居萬壑松風之側因名之曰鑑始齋自沖齡佔
畢至今八旬有八仰沐

昊慈

祖佑精神康健訓政如常實從古帝王未有之事因憶
予少時即喜作詩不屑為風雲月露之詞自御極以來
雖不欲以此矜長然於問政勅幾一切民瘼國是之大
者往往見之於詩計丙辰至丁卯編為初集得詩四千

一百六十六首戊辰至己卯編為二集得詩八千四百
八十四首庚辰至辛卯編為三集得詩一萬一千五百
十九首壬辰至癸卯編為四集得詩九千九百二首甲
辰至乙卯編為五集得詩七千七百二十九首合計五
集共四萬一千八百首亦云富矣古之詩人年高而詩
多在唐為白居易在宋為陸游居易以太和開成編
年分四集為卷僅二百有二為篇僅千有五十六陸游
之詩初編祇四十卷再編通前祇八十五卷本朝輯全

唐詩一代三百年二千二百餘人之作纔得四萬八千九百餘首今予詩五集釐為四百三十四卷總計四萬一千八百首而樂善堂全集在潛邸時所著者尚不入此數是予以望九之年所積篇什幾與全唐一代詩人篇什相埒可不謂藝林佳話乎然予初非以韻語一事與文人學士絮量多寡也夫詩以言志言為心聲非僅絺章繪句如詞人東塗西抹之為且為人君者若專以吟詠為能亦即溺情之一端自古有戒予曷肯出此實

因子臨御六十餘年中間大功屢集鴻儀疊舉兼以予
關心民事課雨量晴占年省歲數十載如一日而閱事
既多析理尤審即尋常題詠亦必因文見道非率爾操
觚者比乃質言非虛語也今春秋八十有八自丙辰授
璽以來猶日訓子皇帝政自維耄耋之年吟什原應從
減擬將每年依例之作量為簡省而事之有關大體者
仍不能不涉筆成章以昭紀實計丙辰至今又閱三年
復得詩數百首此後應於五集外另編餘集若更叨

洪貺算衍期頤復得裒然成帙匯為別集鉅觀豈不更為史冊希有之隆軌乎偶題鑑始齋迴溯髫齡以至今日即詩集之多亦皆

眷貽之厚爰綜其全數並抒夙志附識於此

含德齋詩識語

予於戊申曾命補圖己亥年木蘭射鹿得雙畫幅黏於含德齋壁其時予年七十有八披閱展玩覺少壯時挽強命中雄心猶在是年距獲鹿時已及十載正值平定

臺灣生擒林爽文莊大田二首逆恰符中必疊雙之兆
曾題以詩並命皇子近臣屬和自壬子以後數年或因
節候早寒或因雨水較大未舉行圍之典今予春秋八
十有八精神康健日勤訓政豈尚復以射藝矜能然結
習未忘究未免見獵心喜偶來齋中覩舊日黏壁圖畫
輒為神旺且年來籌勦川楚教匪雖屢殲賊衆其起事
之首逆齊王氏姚之富二犯亦已雙擒殲戮但奔竄餘
匪尚有李全高均德王三槐徐添德冉文儔羅其清阮

正通等皆屬渠魁稔惡刻下大兵四路攻圍計此數逆
首亦當駢連就縛疊符得雙之喜或此時捷音業已在
途早晚即馳至山莊尤所欣願也因觀齋壁舊題復成
是什並識此以紀歲月

物魚亭得句識語

按大雅靈臺之詩以詠歌文王德及於民有臺沼之樂
而民樂其樂然細繹詩辭曰經之營之庶民攻之不日
成之則猶不能不資於民力蓋古者力役之征聖王不

廢周禮所云公旬三日及二日一日即當時役民之法
詩人以文王用民之力而民忘其勞為頌揚歸美之辭
顧予思之用民之力以供遊覽何如不資民力之尤愈
乎我國家偶有工作皆弗用正帑惟以關稅盈餘及內
帑節省者物給價工給值絲毫不以累民而貧者轉受
其利即歷年駐蹕山莊亭臺點綴間事添葺從未嘗少
資民力向年所著知過論已詳言之是予所引為已過
者視大雅所云或猶可無愧乎偶題物魚亭附識數語

以示意

石城詩識語

山莊石城乃康熙年間噶禮罰貲修築者噶禮歷任山西巡撫屢被劾控婪贓等事俱經辯釋嗣任兩江總督經巡撫張伯行劾奏噶禮通同攬賣舉人向主考官索銀五十萬兩噶禮亦列款劾張伯行並奉

旨解任交張鵬翮赫壽查審僅將主考官等抵罪張伯行誣叅議革職贖徒噶禮免議蒙

皇祖嚴飭諭諸部臣及九卿詹事科道等公核以噶禮
張伯行互相訐奏玷大臣職均議革任

皇祖念張伯行居官清正仍留原任噶禮操守難信依
議革職事在康熙五十一年此石城之修當即其時罰
彼所為我國家無力役之征一切工程皆發帑給值從
不累及閭閻至園亭偶有興作則並不用正帑率以內
府餘項為之或貪官污吏罰令出貲使貪黷慝者知所
儆茲偶詠罰築石城一事特檢查噶禮原傳為之仰見

皇祖保全清官懲創墨吏實為仁至義盡不特慎重工
作愛惜勞費而已誠可奉為萬年家法也謹識

雜著

書虞書舜典集傳

偶閱集傳舜典而知蔡沈之未明道也夫沈既自稱述
晦翁其序集傳又屢以明道言之其於而難任人一語
何乃求之深而注之舛也夫此四語乃古今一貫為君
之道蠻夷率服則其效耳蓋為君之道莫難於任人首


三語皆任人之端且其下益曰任賢勿貳禹曰惟帝其難之知人則哲能官人其注難於任人不亦切乎其近章乎其明哉今沈以難訓拒絕任為平聲訓包藏凶惡之人蓋本朱子及時濶之意

按書經傳說彙纂引朱子曰柔遠能邇柔遠却說得

輕能邇是使之帖服之意又引時濶曰難任人難之一字甚嚴曰難者非特去之而已常有戒謹恐懼之意當時既無任人何難之有蓋此心不可以不常存也少不戒謹恐懼則任人或得乘其間矣云云沈之集傳必取義朱時二家之說言之抑亦變而誣矣當日舜咨牧之語本自明顯何嘗有此深意沈本說深意轉失之相盤其所訓殊不足取耳不亦求之深而失之遠乎余向謂以訓疏注

書不如以書注書暇觀此篇率成數語用識昔言之未

誤也



御製文餘集卷二

恭跋

皇考詩文餘集

洪惟我

皇考御極以來勤政之暇每以詩文紀事鉅細畢該天人理
貫誠圖治之權衡臨民之準則也自乾隆元年丙辰至
六十年乙卯

詩成五集共得詩四萬一千八百首

文成三集共得文一千三百五十五篇富有美備不可殫書

滿望

壽越期頤長瞻

天藻與日月同輝昭垂不朽願未能遂痛莫能伸今夏宮中

守制敬於幾暇校閱黃綾

詩文本計自後丙辰至戊午三年中併己未正月復得

詩七百五十首

文三十六首謹編成餘集命尚書彭元瑞侍郎戴衢亨敬司

其事顧餘集之名非予小子所敢臆造恭檢戊午避暑

山莊鑑始齋

御製詩附識內云

計丙辰至今又閱三年復得詩數百首此後應於五集外另編餘集煌煌

聖諭敢弗敬承餘集中諸作

訓政居十之七八不倦於勤孜孜以

誨予小子為先務方期日昃

庭訓永侍

慈顏得所遵循免致失措况近年邪民弗靖塗炭黔黎

示以行軍勝算勉力籌幾雖逆首連伏憲章餘孽未能盡淨

己未正月二日

力疾成望捷之詩孰意此章竟為絕筆嗚呼痛哉天下臣民

讀

殘赤不勝裁之句亦可知予

皇考愛民之一念直流傳於億萬禩亦可知予承

皇考之訓誨除邪安民之苦心實出於萬不得已也餘集既

成敬跋於末頁系以銘曰

文以傳心

詩以言志日月麗天江河行地六十四年

實心實事萬有畢該衆理咸備

法

祖

敬

天臨民圖治文德武功良猷薈萃顧予藐躬欽哉後嗣若凜

淵氷持盈恐墜憶昔承

歡膝下日侍捧

爵依筵隨

鑒攬轡莫覩

慈容昕朝揮淚條過小祥邪氛猶熾

望捷未酬憂懼叢積願

鑒寸忱速昭

靈異

佑子佑民

遺謨早遂庚申孟秋拜手敬誌

[illegible]

嘉慶五年夏

上恭輯

高宗純皇帝聖製詩文自再丙辰暨己未正月之作敬
遵

先志編為

御製詩文餘集越秋告成

親系跋語於是

高宗純皇帝之文章廣大配天地照臨若日月昭垂於

億萬世者

詩五集

文三集聲之以

樂善堂全集定本茲振之以

餘集而十全具足允集大成矣臣等竊惟三極彝訓莫

大乎書而斷自唐虞以二典三謨冠首所紀者

授受之盛封山濬川之功命官敷政之績敬時

齊政之規巡狩觀象之制武則征苗振旅之化

文則明良喜起之歌猗歟顯鑠懿美矣而其開
簡曰若稽古帝堯曰若稽古帝舜帝以表尊古
以誌代左氏傳於地平天成賦納明試戒休董
威失不經邁種德成允成功念茲出茲等語引
典謨者凡九見皆謂之夏書雖伏生以為唐傳
鄭康成以為虞書而左氏在三代時舊說如此
然則典謨雖堯舜之言堯舜之事而其成書則
後之人仰思追慕繼序不忘之所纂述也我

高宗純皇帝貫道成化立

聖人之言載前

八集者已為生民以來所未有茲

餘集更有不可階者自

傳寶以來三年有奇殷殷

訓政即疊疊嗽詞凡

勅幾主敬實晨昏而

體驗之

誨吏型民實

綸綍而奉行之致宮中之

齋肅則

承祭必達恪誠侍

蹕路之詠吟則

按轡先窺

色笑至於

對時育物考古證今皆趨

庭之立禮言詩

聰聰

彝訓也抑更有盛者恭讀

聖製詩中有

合

帝鑒沐德馨斟福酒發御論諳清溫兼愛敬君難父難

子福予福之句

至愛深仁情肫言藹又敬讀

恭跋中名集述

鑑始之詩絕筆愴

望捷之作捧

爵隨

鑒昕朝叢積凜

心傳而懷

手澤紹聞衣德慙著愛存盛矣大矣孟子謂聖人人倫

之至而道法乎堯舜倫盡乎君臣猶未足以稱

道我

聖

聖相承止慈止孝之邳隆也

臣

等禱昧壚拘幸親見

編輯之成

頒行海宇傳諸宙合俾咸誦

聖謨明訓仰瞻

至德要道謹以管窺錐指之見綴言簡末

臣

朱珪

臣

彭元瑞

臣

戴衢亨

臣

周興岱

臣

趙秉冲拜手稽

首恭識

[illegible]